

# PRONI mjesečni bilten

AVGUST—SEPTEMBAR 2010. godine



## SADRŽAJ

- 14. Susreti mladih RS-a P.1
- Volonteri na kampu u Bačkoj Topoli P.2
- Projekat "Sačuvajmo naše blago" P.3
- 2KM P.4
- Susreti iz ugla volontera P.5
- GLASAM!!! P.6
- Izlazim!!! P.7

## 14. SUSRETI MLADIH RS-a

Bijeljina i PRONI Centar za omladinski razvoj u suradnji sa OSRS su bili domaćini 14. Susreta mladih Republike Srpske, koji su održani u periodu od 27.-29.08.2010. godine. Na susretima je učestvovalo 254 mladih iz BiH i Srbije. Mladi iz Mostara, Banja Luke, Tuzle, Rogatice, Trebinja, Višegrada, Foče, Ruda, Milića, Srebrenice, Bratunca, Vlasenice, Istočnog Sarajeva, Sokolca, Brčkog i Bijeljine su zajedno proveli tri dana u YouthWill-u u Bijeljini, na pomoćnim terenima FK Radnik. Imali su priliku da učestvuju na različitim radionicama: Kroz jezik sa osmjehom, Štednja, berza i mladi, Kako tražiti posao, Prva pomoć danas, Reproductivno zdravlje i Timski rad. Tokom ovih susreta odrađena je i akcija dobrovoljnog davanja krvi.

Za mlade su tokom tri dana pripređene i brojne zabavne aktivnosti tokom kojih su im se pridružili i građani Bijeljine.

Organizatori 14. susreta mladih su OSRS (Omladinski Savjet Republike Srpske) i PRONI Centar za omladinski razvoj. Susrete je finansirala Vlada Republike Srpske i brojni sponzori.

## Projekat „Pitanja mladih pitaju mladi“

PRONI Centar za omladinski razvoj u suradnji sa Centrom za Promociju Civilnog Društva, sprovodi projekt "Pitanja mladih pitaju mladi".

Projekat će da obuhvati umrežavanje aktivista omladinskog sektora Brčko distrikta BiH kroz obuku i konkretni rad na manjim akcijama zagovaranja. Projekat će trajati pet mjeseci i direktno će obuhvatiti 15 učesnika, aktivista omladinskih organizacija.

### Mladi iz Brčkog će kroz projekat da:

- učestvuju u radionicama zagovaranja za aktiviste Brčko distrikta BiH
- učestvuju pripremnim sastancima zagovaranja "Pitanja mladih pitaju mladih"
- sprovedu male akcije javnog zagovaranja

# 14. Susreti mladih RS-a

## Otvaranje 14. Susreta mladih Republike Srpske

Četrnaesti po redu susreti mladih su počeli samim dolaskom mladih za koje je bio organizovan prevoz iz brojnih gradova. Nakon smještaja mladih u šatore, koje su donirali, dovezli i smjestili ljudi iz Crvenog Krsta Republike Srpske i Vojske. Nakon toga mladi su organizovano prevezeni do Centra za visoko obrazovanje u Bijeljini. Manifestaciju je otvorio predsjednik Organizacionog odbora manifestacije i predsjednik Narodne Skupštine RS Igor Radojičić. Veliki amfiteatar Centra za visoko obrazovanje je bio dovoljno veliki da primi sve mlade koji su došli na kamp, brojne goste i zvaničnike iz Bijeljine i Republike Srpske. U programu, pripremljenom za svečano otvaranje Susreta, učestvovala je i hor Srbadija iz Bijeljine i Gradski tamburaški orkestar iz Banjaluke. Nakon svečanog otvaranja susreta i povratka na pomoćne terene gradskog stadiona FK Radnik, mladi su se zabavili uz Blažu i kljunove, kao i DJ-a.

## Drugi dan susreta

Drugi dan susreta započeo je gimnastikom, odnosno organizovanim skupljanjem smeća po terenu. Mladi su bili aktivni i učestvovali u ovoj jutarnjoj aktivnosti. Organizovano je bilo tuširanje kao i hrana tokom cijelih susreta u okviru ovog prostora. Mladi su sami birali radionice na kojima će učestvovati, kao i učešće u akciji dobrovoljnog davanja krvi. Radionice koje su odražne ovaj dan su: Timski rad, Prva pomoć i Reproaktivno zdravlje. Nakon prijepodnevnih aktivnosti mladi su imali dovoljno slobodnog vremena da malo upoznaju grad Bijeljinu. Za ovo veče mogli su da biraju učešće na predstavi "Sutra je ispit" Banjalučkog studentskog pozorišta koja je igrala u Centru za kulturu ili da slušaju MUVE u Gradskoj biblioteci "Filip Višnjić". Po povratku u kamp ponovo su uživali u muzici (Ne) normalnog Balašević tribut benda i na kraju ponovo DJ.

## Treći dan susreta i rastanak

Treći dan je takođe počeo radno, ponovo sakupljanjem smeća po terenu, čime su mladi pokazali da brinu za svoju okolinu, zatim jutarnjim tuširanjem i doručkom. Radionice kojima su mladi prisustvovala ovaj dan bile su: Kroz jezik sa osmjehom, Štednja, berza i mladi i Kako tražiti posao. Veliko interesovanje kod mladih je izazvalo predavanje profesora Telebaka, te su i nakon radionice nastavili druženje sa profesorom. Mladi su oslikali zajedničku zastavu susreta, pojedini su i sebe ili drugove obojili, predstavili povelju mladih medijima koji su ih pomno pratili tokom susreta, spakovali svoje stvari i ponovo organizovanim autobusima vratili se svojim kućama. Na mjestu gdje su najviše vremena proveli, zatvoreni su 14. susreti mladih.

Mnoga nova prijateljstva su sklopljena, mail adrese i brojevi mobilnih razmijenjeni. Mladi su još jednom pokazali da mogu biti za primjer i bez problema učestvovati u ovako masovnim manifestacijama, da su dovoljno zreli i za veće zadatke i da su vrijedni pažnje. Ovo je bila lijepa, korisna i značajna organizacija jednog događaja koliko za mlade ljude toliko za PRONI i za grad Bijeljinu, čiji su mještani raširenih ruku prihvatila mlade goste i pokazali se kao veoma dobri domaćini. Dosta mladih iz Bijeljine, volontera PRONI-a, je radilo tokom cijelih susreta i zajedno sa zaposlenima učestvovali u organizaciji susreta, spavali zajedno sa učesnicima u šatorima i prisustvovali i zabavnom dijelu Susreta. Ti mladi su dali i svaki atom svoje snage i pokazali da se na njih možemo osloniti u potpunosti i na njih računati. Mladi zaslužuju pažnju i dovoljno su vrijedni da ostvare svoje ciljeve.

## Volonteri na kampu u Bačkoj Topoli

U Bačkoj Topoli je od 25.-31. jula 2010. godine, održan IV Kamp TOLERANCIJE mladih podunavskih regija i gradova, na kome su učestvovali volonteri PRONI-a, Gorana Planinčić i Mladen Mijić, kao jedini predstavnici Bosne i Hercegovine i Republike Srpske. U kampu je učestvovalo oko 150 mladih iz različitih podunavskih gradova i regija. Svakodnevno su se održavale prezentacije svih gradova sa ciljem daljeg jačanja tolerancije, razumjevanja, međusobnog uvažavanja i interkulturalnog dijaloga. Rezultat kampa su mnogo prijateljstva i bliskost koju sa sigurnošću osjećaju svi učesnici. I na kraju, TOLERANCIJA nas je učinila jednakima.



# Projekat "Sačuvajmo naše blago"



Volonter PRONI-a, Milan Trifunović je kao učesnik internacionalnog edukativnog programa "Balkan let's get up" dobio priliku da realizuje mini projekta u svojoj lokalnoj zajednici, u ovom slučaju selu Magnojević kod Bijeljine.

Milanov projekat nosi naziv "Sačuvajmo naše blago", a cilj ovog projekta je bio da se očisti selo Magnojević od smeća i da se direktno utiče na svijest mještana da prestanu bacati smeće i time ugrožavati okolinu u kojoj žive. Kao jedna od aktivnosti u sklopu ovog projekta bila je održavanje prezentacije mještanima sela. Milan je, uz podršku PRONI osoblja i volontera, održao predavanje mještanima u sali Doma kulture u Magnojeviću. Prezentacija je održana 15.08.2010. godine i cilj je bio da se predstavi mini projekat "Sačuvajmo naše blago", a sa druge strane da se pozovu

mještani sela Magnojević i da se dobrovoljno uključe u akciju čišćenja sela koja se održala 16.08.2010. godine.

U punoj sali Doma kulture Milan je uspješno predstavio svoj projekat i sa velikim aplauzom i odobravanjem mještana organizovao akciju čišćenja sela. U ovoj akciji učestvovali su PRONI volonteri: Mladen Mijić, Borjana Planinčić, Maja Mrković, Jelena Savić, Nikola Kapetina i Angelina Ilić, koji su došli iz grada da pomognu mještanima u akciji čišćenja sela i time daju primjer ostalim mladim ljudima kako da se brinu o svojoj okolini i ekologiji uopšte.

Akcija kupljenja smeća je uspješno realizovana i volonteri su tokom 5 sati rada skupili preko 15 vreća smeća koje su bačene u kontejner i odvezene na otpad. Ovo je samo jedan od primjera kako mladi volonteri PRONI-a svojom aktivnošću direktno utiču na pozitivne promjene u svojoj zajednici i daju primjer drugim mladim ljudima.

## Akcija u očima nosioca aktivnosti Milana Trifunovića

U jednom trenutku sam smatrao da me nijedna poteškoća u projektu nije zaobišla, jer sam imao puno problema oko tehnike, tokom pripreme, bio sam nervozan itd., ali projekat je išao dalje. Volja me nije napuštala, bila je poljuljana ali sam ipak nastavio sa radom.

Što se tiče konkretno prezentacije ljudi koji su prisustvovali prezentaciji su razumjeli poruku koju sam im htio poslati.

Što se tiče radne akcije uspjeli smo da očistimo najugroženija mjesta.

Ovaj projekat vidim kao bukvar. Mjesto gdje sam počeo i mnogo toga naučio.

I na svemu tome sam zahvalan svima onima koji su mi to obezbijedili.

## Uskoro:

## "FORA"!!!

PRONI Centar za omladinski razvoj Brčko distrikta BiH deseti put za redom organizuje Festival omladinskog rada "FORA".

Festival je idealna prilika za mlade ljude, aktiviste i volontere PRONI-a, drugih NVO i grupa mladih iz BiH i regiona da prikažu i predstave svoj rad i angažovanje.



# 2KM

Druga konferencija mladih Bosne i Hercegovine je održana od 26-30. jula 2010. u Banja Luci, koja je organizovana od strane UG Benevolentia i PRONI Centra za omladinski razvoj.

Ove godine tema Konferencije je bila umjetnost i to: ples, muzika, gluma, slikarstvo i fotografija. Cilj ove Konferencije je bio da okupi mlade umjetnike iz cijele Bosne i Hercegovine na jednom mjestu kako bi ispoljili svoju kreativnost kroz neku od umjetničkih radionica i predstavili javnosti svoj angažman.

Za ovu Konferenciju apliciralo je više od 100 mladih ljudi, od čega je izabrano 30 učesnika.

Učesnici su došli iz raznih krajeva Bosne i Hercegovine: Bugojno, Sarajevo, Bijeljina, Banja Luka, Travnik, Doboj, Gračanica, Tuzla, Zenica, Trebinje, Mostar i Laktaši.

Ispred PRONI Centra za omladinski razvoj, kao učesnik na radionici fotografije je bila Maja Mrković, a kao volonteri Bojana Hadži-Stević, Ivana Marković i Vanja Marković.

Program Konferencije je sadržao jutarnje igrice (energizere) koje su imale za cilj da probude i razdrmaj u učesnike prije radionice. Na radionicama učesnici su bili podjeljeni u grupe, u zavisnosti za koju umjetničku radionicu su se prijavili, a sva ta dešavanja su održana u Domu omladine.

Pored umjetničkih radionica, održane su radionice „predrasuda i stereotipa“ koje su vodili gosti iz Balkan Idea, Novi Sad i Gender radionica uz vodstvo predavačice Dijane Tepšić. Takođe, održana je i prezentacija SHL-a na kojoj su učesnici mogli da čuju kako da apliciraju sopstvene umjetničke projekte.

Radionicu plesa vodila je Tea Koljančić koja sa svojom grupom naporno trenirala kako bi pripremili preformans za svečano zatvaranje. Plesna tačka je sadržala motive folklor, hip-hopa, modernog plesa i baleta.

Radionicu muzike je vodila Dijana Tepšić i sa učesnicima grupe razgovarala o muzici koju mladi danas vole i slušaju. Učesnici muzičke radionice su odlučili da naprave pjesmu u kojoj će do izražaja doći i tekst i muzika. Uz mnogo truda i rada učesnici su napravili pjesmu pod nazivom „Savršeni svijet“, koja je ujedno postala i hit Konferencije.



Radionicu glume vodio je Novica Bogdanović o osnovnim terminima koje bi svaki glumac trebao da zna kada radi na predstavi. Napornim vježbanjem i radom ovi učesnici su uspjeli da pripreme malu predstavu pod nazivom „Prvo pa žensko“ i uspješno su je izveli na svečanom zatvaranju, te oduševili publiku svojim talentom.

Radionicu slikarstva vodila je Aleksandra Partalo. Učesnici ove radionice su slikali na teme pejzaž i slobodnu temu. Dio radionica su radili na Kastelu. Svaki učesnik je naslikao najmanje po dvije slike.

Radionicu fotografije je vodila Željka Žolja. Na početku Željka je sa učesnicima razgovarala na temu fotografije i pravilnog fotografisanja. Njihove teme za fotografisanje bile su: slobodna tema, modeli, detalji, pijaca, šah i park. Oni su za kratko vrijeme savladali tehnike fotografisanja i na završnici predstavili 36 najboljih fotografija.

Svečano zatvaranje 2. Konferencije mladih BiH je održano 30.7.2010. u 20.00h u Domu omladine. Tokom večeri svi učesnici su imali priliku da prezentuju svoje radove i nastupe na kojima su radili prethodna četiri dana. Na samom početku večeri publici je prikazan video sa 1. Konferencije mladih, a nakon toga predstavili su se učesnici sa sekcija plesa, muzike i glume. Publika je pozdravila sve učesnike gromoglasnim aplauzom i time nagradila njihov uloženi trud. Svi prisutni su imali priliku da vide radove radionica slikarstva i fotografije, koji su bili izloženi u prostorijama Doma omladine. Posle svečanog zatvaranja svi učesnici i organizatori su otišli na after party u Demofest klubu, gde su prisutne zabavljali grupa Jackass i DJ Dijana Tepšić.

# Organizacija susreta iz ugla volontera



Sve je počelo kada smo dobili vest da smo upravo mi, PRONI centar za omladinski razvoj, ove godine organizatori 14. susreta mladih Republike Srpske. Tada nismo ni slutili u šta se tačno upuštamo, ali ipak ta vest kod svih nas je izmamila osmeh. Kako su se dani Susreta približavali u našoj maloj kancelariji razgovor između volontera bio je sve glasniji i svakog dana su se rađale nove ideje.

Tim od petnaest vrednih mladih ljudi je marljivo radio i pripremao se za ovaj događaj dva meseca. Meni, kao jednom od volontera, pripala je čast da budem upravnik kampa „YouthWill-a“. To je za mene bila velika čast a ujedno i velika odgovornost. Tokom tri dana, koliko su trajali Susreti, saradnja između volontera je bila odlična. Naoružani osmehom, ugostili smo vršnjake ne samo iz RS nego i iz FBiH i Srbije. Tri dana nas petnaestoro je funkcionisalo kao jedno. „Svi za jednog, jedan za sve!“ , iako neizgovorena, bila je naša parola. Iako puni zaduženja i obaveza koje smo imali, tih dana smo upoznali mnogo ljudi i stekli prijateljstva koja će sigurno da traju još dugo.

Sada kada su se Susreti završili, ponosna sam ne samo na sebe i na tim ljudi sa kojima sam radila, nego i na spoznaju da smo dokazali da mladi mogu da se uhvate u koštac sa ozbiljnim i velikim stvarima samo ako im se pruži prilika.

*PRONI volonterka Vanja Marković*

## 2KM iz ugla učesnice Maje Mrković

Druga konferencija mladih u Banjaluci, ove godine je održana od 26. do 30. jula. Poslala sam prijavu ne očekujući mnogo. Međutim, kada su mi javili da sam izabrana među trideset ljudi koji će imati priliku da nauče nešto novo o umjetnosti i pokažu svoj talent, pomislila sam da bi to mogla biti dobra prilika za napredovanje.

Nakon što smo se smjestili i upoznali, 27. 08.2010. smo počeli raditi. Na svakoj radionici je bilo po šestoro učesnika. Htjela sam da naučim mnogo više o fotografiji. Ranije nisam imala priliku da na ovaj način saznam nove, zanimljive stvari koje su mi mnogo pomogle, kako je pokazala izložba. Prvi dan smo slušali teoretski dio, koji je bio iznenađujuće zanimljiv. Obratili smo pažnju na neke stvari koje ranije nismo primjećivali na svojim fotografijama. Pred nama su bila samo tri dana da radimo, biramo fotografije i pripremimo ih za izložbu. Šetali smo Banjalukom i primjećivali detalje, fotografisali ih, pred kraj radionice prebacivali na računar i komentarisali. Otvoreno smo jedni drugima govorili zamjerke, ali isto tako i pohvale. U svemu tome neumorno nam je pomagala Željka Žolja, koja je vodila radionicu. Veoma čudno, ali nakon drugog dana rada, prebacivši fotografije na računar, svi smo iznenađeno gledali u monitor. Napredak je bio očigledan. Primjećivali smo i dalje sitnice koje su bile naizgled nezanimljive, ali smo od njih učinili da ipak postanu nešto drugačije. Nalazili smo uglove iz kojih bi bezvrijedni kamenčić na putu predstavio nešto posebno. Treći dan smo pripremali izložbu. Izabrali smo oko trideset fotografija, odredili boju rama koja najbolje odgovara i rasporedili ih.

Svi su bili oduševljeni onim što smo uradili. Izložbu je posjetio i profesor sa Likovne akademije i bilo mu je teško da povjeruje da smo uspjeli sve ono uraditi za samo tri dana. Ja sam prezadovoljna iskustvom koje sam ponijela iz Banjaluke. Naučila sam mnogo toga što će mi pomoći u daljem radu, a i sklopila prijateljstva koja se neće lako prekinuti.

*PRONI volonterka Maja Mrković*



# GLASAM!!!



Forum građana iz Tuzle i PRONI Centar za omladinski razvoj su u Brčkom (27.09.2010. godine na Trgu mladih) i Bijeljini (20.09.2010. godine na Trgu Kralja Petra I Karađorđevića) odradili ulične akcije pod nazivom "Vlast je u tvojim rukama" koje su imale za cilj da afirmišu mlade ljude iz ovih gradova da izađu na Opšte izbore 2010 i glasaju. Akcija je dio projekta „Opšti izbori 2010 – Vlast je u vašim rukama“. Tokom

ovih akcija, mladi su imali priliku da napišu svoje zahtjeve vlastima koje će birati na predstojećim izborima, odnosno vlastima koje budu izabrane na ovim izborima. Svi zahtjevi su se odnosili na mlade i njihove potrebe, odnosno sve ono što vlasti inače treba da rade da bi mladi imali normalan život u ovoj državi.

Volonteri PRONI-a su bili glavni aktivisti na ovoj aktivnosti i oni su animirali mlade i građane Brčkog i Bijeljine da napišu i ubace svoje zahtjeve u imitaciju glasačke kutije. Svi zahtjevi će biti revidirani i naknadno korišteni u TV emisiji koja će biti emitovana na jednom od lokalnih medija i u kojoj će prisustvovati predstavnici novoizabranih vlasti, kao i u drugim medijima tokaom rada na ovom projektu.

## Volonteri PRONI-a počeli rad na projektu "Pitanja mladih pitaju mladi"

Volonterke PRONI Centra za omladinski razvoj Elvisa Adžikić i Milijana Delić su u nedjelju, 19.09.2010. godine, u Brčkom održale prvi jednodnevni trening na temu "Pitanja mladih i javno zagovaranje".

Trening je rađen u okviru projekta "Pitanja mladih pitaju mladi" i trening je imao za cilj međusobno upoznavanje učesnika, upoznavanje grupe sa pojmom javnog zagovaranja kao i problemima sa kojima se mladi u Brčko distriktu svakodnevno susreću. Treningu je prisustvovalo 12 mladih iz 4 omladinske organizacije iz Brčko distrikta.

Drugi trening je održan već slijedećeg vikenda, u nedjelju 26.09.2010. godine, u vremenu od 14 - 18 h. Ovaj trening su radile Milijana Delić i Katarina Vučković, tema je bila vezana za poruke javnog zagovaranja i za ciljnu grupu u javnom zagovaranju.

Slijedeći trening se bavi ulogom medija u akcijama javnog zagovaranja i ovaj trening će raditi Milijana i Elvisa, aktivistice PRONI-a, uz pomoć trenera PRONI-a.

## YOUth ZONE!

Radio emisija namijenjena mladima, koju PRONI realizuje u saradnji sa Radiom Brčko, nastavlja sa radom u novoj sezoni i novom dužem terminu, i to nedjeljom od 20-22h. Pored standardnih tema, tema vezanih za pitanja i aktivnosti mladih u Brčkom, emisija sada ima i top listu.

Uskoro ćete moći omiljene ili propuštene radio emisije preslušati ponovo na našoj web stranici.

Slušajte YOUth ZONE, nedjeljom od 20-22 h na Radio Brčko.

## Ulična akcija "Izlazim"



S ciljem povećanja izlaznosti mladih BiH na izbore kao i njihovog interesa za politička zbivanja i svoj položaj u društvu 20-ak lokalnih organizacija mladih i grupa iz 30 gradova BiH u saradnji sa Omladinskom informativnom agencijom BiH (OIA) provelo je kampanju „IZLAZIM 3.10.“. Na prošlim opštim izborima glasalo je samo 47% mladih, a prema nedavnom istraživanju 78% mladih je izjavilo da nije zainteresovano za politiku. Upravo zbog toga se i došlo na ideju organizovanja ulične akcije u 32 grada BiH, na kojoj će se razgovarati sa mladima, predstaviti informacije o izlasku na izbore uz izložbu postera i poruka mladih iz čitave države.

Osnovni argumenti mladih protiv izbora su da „nemaju za koga glasati“ i „da njihov glas ne vrijedi“. Međutim, u ovoj kampanji mladi se informišu o „otvorenim listama“ na kojima mogu pronaći više od 30 stranaka, a na web portalu se obrazovati o tome koja stranka šta nudi i šta zastupa, kao i da mogu glasati samo za pojedince. Na listama će se naći i 1.834 kandidata koji imaju ispod 30 godina i većina će se po prvi put boriti na izborima.

Ulične akcije „IZLAZIM“ koje organizuju PRONI i OIA su održane u Bijeljini 30.09.2010. godine na Trgu Kralja Petra I Karađorđevića i u Brčkom 1.10.2010. godine na Trgu mladih u Brčkom gdje su mladi ohrabreni da napišu pismo Gradonačelniku Brčko distrikta BiH o pitanjima mladih. Građani Bijeljine i Brčkog, kao i ostalih gradova koji su uključeni u ovu akciju, mogli su pogledati postere i kratke filmove koji su dizajnirali i snimili mladi širom BiH.

Kampanju „IZLAZIM“ podržali su Centri civilnih inicijativa, NED i Misija OSCE-a u BiH.

## EVS volonterka iz Poljske u PRONI-u

PRONI je već devet mjeseci član EVS-a (Evropskog volonterskog servisa) i nakon svih obuka i dogovora konačno smo ugostili jednog volontera. Dagna Lewandowska je djevojka iz Poljske koja će narednih 9 mjeseci volontirati u PRONI-u.

Dagna je završila master studije Međunarodnih odnosa na Varšavskom Univerzitetu i tokom svog boravka u PRONI-u radiće uglavnom radionice na temu ljudskih prava sa učeničkim vijećima srednjih škola u Brčkom i sa volonterima PRONI-a na drugim aktivnostima.

Tokom septembra mjeseca, Dagna je učestvovala u svakodnevnim aktivnostima PRONI-a, akcijama koje rade volonteri, upoznala se sa radom organizacije, upoznala je grad i započela učenje lokalnog jezika kako bi što lakše komunicirala s mladima i građanima BiH. Pored toga Dagna je započela da priprema info tačku o programu Mladi u akciji i EVS-u, te intervjuje sa volonterima i volonterkama.

Dagna je u PRONI došla kao EVS volonter, u sklopu programa Mladi u akciji (Youth in action), te će tokom svog volonterskog staža raditi i na promociji EVS-a i na taj način animirati mlade iz Brčkog da se uključe u ovaj vid razmjene.

## Nešto više o PRONI-u



### Omladinski rad

PRONI je do danas implementirao oko 300 manjih omladinskih i volonterskih projekata koji su uključili više od 4000 mladih. Od 1999. godine PRONI organizuje različite projekte na otvorenom: festivali, koncerti, turniri, kampovi, itd. Od 2002. godine PRONI je otvorio 4 omladinska kluba u: Brčkom, Maoči, Potočarima i Bijeloj, što se kasnije proširilo na 27 omladinskih klubova u mjesnim zajednicama Brčko distrikta.

### Volonterizam

PRONI realizuje volonterske programe koji daju mogućnost mladima da učestvuju na volonterskim treninzima i da implementiraju svoje projekte u Brčkom i Bijeljini. Do sada je PRONI obučio oko 150 volontera koji su implementirali oko 70 različitih projekata za mlade i djecu. PRONI takođe prihvata lokalne i međunarodne volontere koji imaju iskustvo u omladinskom radu i uključeni smo u EVS (međunarodni volonterski servis za razmjenu volontera).

### Baza trenera

PRONI je oformio "Bazu trenera" i pokrenuo kurs "Osnove omladinskog rada" sa ciljem da se odgovori na potrebe lokalne zajednice za neformalno obrazovanje. "Baza trenera" obučava grupe mladih i odraslih u oblastima ljudskih prava, komunikacije, razrješenje konflikta, grupni i timski rad.

### Omladinska politika

PRONI se već duže vrijeme bavi razvojem omladinske politike za Brčko distrikt u saradnji sa drugim omladinskim organizacijama, te razvojem i promocijom omladinske politike u Bijeljini.

PRONI je nevladina, neprofitna i nestranačka organizacija koja radi na području Brčkog od 1998. godine i na području Bijeljine od 2004 godine.

Naša vizija:

PRONI Centar za omladinski razvoj ima viziju da svi mladi ljudi imaju sposobnost da razviju sebe i jednaku mogućnost da doprinesu demokratskom i pravednom društvu u kome su njihove potrebe prepoznate i riješene.

Danas PRONI radi na edukaciji o ljudskim pravima, te radi na razvoju aktivizma mladih u zajednici, razvoju volonterizma, razvoju omladinske politike.

PRONI-jev rad se ogleda kroz treninge, seminare, radionice, okrugle stolove, razmjene volontera i mladih, festivale i druge aktivnosti koje podstiču multietničnost, saradnju i sigurnu životnu sredinu.

## PRONI Centar za omladinski razvoj

Ul. Bosne Srebrene br. 16.  
76101 Brčko  
tel/fax: +387 49 217 695

Ul. Ivana Gorana Kovačića br. 5.  
76000 Bijeljina  
tel: +387 55 213 046

pronibrbc@teol.net  
www.pronibrcko.ba